

## **Cussegl pastoral – rapport dalla presidenta 2023/2024**

Cun 4 premcommunicants havein festivau ils **16-4-2023 dumengi'alva** cun il tema «Jesus, il paun dalla veta».

La sontga messa ei puspei vegnida embellida cun il chor ad hoc. Quel vegn menaus sco mintg'onn da Rilana Cadruvi, uonn cun 25 cantaduras e cantadurs. Suenter messa ha il cussegl pastoral purschiu in aperitiv. La societad da musica ha accompignau la fiasta.

A caschun dil **di dalla mumma** ils **14-5-2023** ha il cussegl pastoral purschiu in aperitiv a Zignau, a Schlans ed a Trun – sponsuraus da Trun turissem.

Per la fiasta da **Sontgilcrest** ils **8-6-2023** cun processiu sin Casa s. Martin havein organisau cun Crista Pelican ch'ils premcommunicants prelegian ina supplica. Era ha la cumminonza cantau entginas canzuns. Quei ha fatg grond plascher al pievel.

A caschun dalla **perdanonza da Schlans** ils **18-6-2023** ha il cussegl pastoral offeriu in aperitiv, che Toni Pfister e la giuventetgna da Schlans han organisau.

Ils **23-6-2023** han sur Tomasz ed il catechet Stefan Bolli embelliu la messa da **finiziun da scola**. Scholaras e scholars han festivau lur davos di da scola a Trun ed ein semess sin via ora el mund.

A caschun dalla **perdanonza da Zignau** ils **25-6-2023** ha il cussegl pastoral purschiu in aperitiv, organisau da Claudia Küttel e sia famiglia.

Ils **6-7-2023** ed ils **13-7-2023** han comembras dil cussegl pastoral fatg ina **viseta a parochians** dalla pleiv s. Martin ch'ei sesents en casas da tgira d'ordeifer. Las visetas a Vella, Glion e Cumpadials ein vegnidas apprezzadas fetg ed ils cussadents gaudan la paterlada ed era il present che vegn mintgamai surdaus el num dalla pleiv.

Ils **16-7-2023** ha la presidenta dil cussegl pastoral Isabelle Defuns organisau, muort assenza da sur Tomasz, **in survetsch divin dil plaid** a Trun. La tematica ei stada "Il semnader".

Mardis, ils **14-8-2023** havein festivau in survetsch divin per **l'entschatta dalla scola** e quei puspei per tut tgi che ha giu plascher dad entscheiver quei di cun Diu. Per quella sontga messa han las catechetas Rilana Cadruvi ed Isabelle Defuns collaborau. La tematica digl onn ei: "fastitgs". En zuler dalla casa da scola ei vegniu tschentau ina plonta. Leu ha mintg'affon pendiu in fastitg sco simbol per quei onn da scola.

Ils **20-8-2023**, in di da bellezza aura, havein festivau la **sontga messa campestra** ell'Ogna. La messa ei vegnida embellida cun cant e musica dalla famiglia Scherrer: Eva Luisa, Anna Catrina, Giulietta e Clara Maria cun Clau Scherrer e Rilana Cadruvi. Varga 80 persunas han fatg part. Suenter messa havein saviu guder ina grillada cun salatas e risotto ch'il Toni Pfister ha preparau cun agid da sia sira. Era désserts ha ei dau. Al gentar sin la piazza da giugs ein rodund 65 persunas stadas presentas.

Ils **10-9-2023** havein saviu festivar la **perdanonza a Nossadunna dalla Glisch**. Da bellezza aura havein festivau la sontga messa da Numdamaria giuadora, embellida dil chor. La procession ha priu ina ruta nova, accumpignada dalla socitad

da musica. Las mattas han saviu purtar/stuschar la statua da Nossadonna cun in niev carr. In bi usit ed ina biala fiasta che duei vegnir mentenida.

Il **viadi dalla pleiv**, organisaus dil cussegl pastoral havein fatg ils 30-9-2023 a **Locarno**. La damaun ein 24 persunas idas cul bus encunter il Lucmagn. Sin viadi havein giu in'intressanta guida historica dad Olivia Pfister. Ella ha explicau entgins fatgs historics. Suenter ina cuorta pausa da caffè havein cuntinuau tochen alla Madonna del Sasso. Suenter entginas explicaziuns dil pader caputschin havein astgau guder la sontga messa cun sur Tomasz. Tgi a pei e tgi cun la funiculara essan lura serendi encunter la piazza grande nua che nus havein gentau ell'ustria "Ristorante Pizzeria Portico".

Cun venters pleins ha tgi che ha vuliu fatg in viadi cul trenino tras Locarno, ni gudian la fiera sin la piazza grande. Suenter in bien glatsch havein saviu seser egl auto e semetter sin via encunter il pass dil Lucmagn. Leu spitgava in caffè ed in toc petta. Per finir havein visitau la caplutta da sontga Maria e suenter ina cuorta devoziun havein bandunau il pass e returnai staunchels e da buna luna a casa.

A caschun da la **perdanonza da Trun**, dumengia dil rusari dils **2-10-2023**, ha il cussegl pastoral purschiu in aperitiv.

Las duas catachetas Rilana Cadruvi ed Isabelle Defuns han puspei creau in **flyer** per mauns dad affons e giuvenils. Tema: "Sin via cun Diu. Neu e smarvegla". Cun quei flyer porschan ellas in program per affons e giuvenils, ordeifer il temps da scola. Denter auter vegn purschiu ina devoziun per las **olmas** cun viseta sin santeri ed era ina devoziun da **rorate**.

Naturalmein s'auda era il chor per Nadal e per Dumengi'alva tiel program. Quei program che cumpeglia purschidas per affons da

scoletta tochen giuvenils dil scalem superiur ei facultativs per tut tgi che ha plascher.

Il **di da suppa** dils **12-11-2023** organisein nus per ordinari entuorn la fiasta da s. Martin, nies sogn patrun baselgia. Il venderdis havein preparau la suppa el Cafè Tschut. Suenter ha **Beni Lutz** fatg per nus la suppa. Ella **ha offeriu tut** e buca schau pagar la suppa. Ad ella in grond engraziel per sia grondiusa lavur e sia generusadat.

Il di da suppa ein rodund 80 persunas serendidas suenter messa en sala da cultura per guder la buna suppa, las pettas ed era la tombola usitada. Il recav da 1'670 frs. ei ius en favur dad ina casa dad affons cun impediment en Pologna.

**Rorate** ils **14-12-2023** vegn organisau cun la scola e suenter in di d'advent cun gentar e differents posts per tut ils affons dalla scola. La pleiv ha offeriu in paunet cun ina tschugalata ed ina ovomaltina caulda.

Era uonn havein purtau **la glisch da Bethlehem, la glisch dalla pasch** en baselgia s. Martin. Las candeilas ein vegnidass messas a disposiziun dalla pleiv per prender la glisch a casa. Spert ein ellas stadas naven. La purschida vegn veramein schazegiada.

Ils **13-12-2023** havein astgau visitar cun 22 affons dil chor ad hoc da Nadal la **Casa s. Martin**. En ina cuorta devoziun cun ina historia, cun canzuns, oraziuns e buns patratgs han las catachetas Rilana Cadruvi ed Isabelle Defuns purtau in tec tempru da Nadal als cussadents. Era havein saviu reparter a mintga cussadent ina rucla da Nadal cun in bien giavisch. Quella rucla han ils affons zambergiu duront l'instrucziun da religiun.

Alla **messa da Nadal per familias** ils **24-12-2023** han biars fatg part e la baselgia era emplenida. Il teateret dils scolars dalla 4. classa ed il cant da 34 affons dalla scoletta tochen giuvenils gia ord scola han embelliu la sontga messa.

Era uonn han ils **Treis retgs** cantau ils **8-1-2024** sin differentes plazs avon baselgias, capluttas e sil plaz da scola. Sin tut ils plazs havein purschiu allas persunas presentas vin cauld e punsch.

Duront ils dis da Pastgas ha il cussegl pastoral sco usitau **vendiu las candeilas da Pastgas**. Biars selegran mintg'onn dalla candeila.

Cun 5 premcommunicants havein festivau ils **7-4-2024** **dumengi'alva** cun il tema «Viandar els fastitgs da Jesus». La sontga messa ei puspei vegnida embellida cun il chor ad hoc. Quel vegn menaus sco mintg'onn da Rilana Cadruvi Scherrer, uonn cun 21 cantaduras e cantadurs. Suenter messa ha il cussegl pastoral purschiu in aperitiv. La societad da musica ha accumpignau la fiasta.

Jeu engraziel a tut ils commembers ed a tuttas commembras dil cussegl pastoral per lur engaschi, alla suprastanza dalla pleiv ed a sur Tomasz per il sustegn.

